



644-414



B 24823

C40
4514
(183)



C40-4514



B 64853

開密運靈機千差競入



學

能面稟佳猷道聽途傳歲月徒增渴想茲因南  
明禪友持錄相示焚香頂讀自覺潛神再玩淵  
微初心頗愜何期不出蛙居而聞所未聞生逢  
斯世而遇此難遇如展智囊始知已見之朦  
似入大海方信江湖之狹淺自慚無德莫可讚  
揚畧着數言聊伸翹致爾

萬曆甲寅年夾鍾月

日嗣曹洞正宗第二

十七代會稽晚學雲門顯聖寺住持圓澄沐

手撰

無幻禪師語錄序

從古衲僧大事明了者如麻如粟但得已躬安  
貼便自休去歇去絕無語句漏逗流傳誰謂千  
七百則葛藤而外佛法遂爾斷滅幻上人於無  
趣老人處得些氣息便爾揚眉瞬目濶步禪林  
搖唇弄舌何異蛟龍得一滴水便會作浪興波  
法孫某比丘哀次成書程尚甫刻而傳之然非  
幻上人之意也近代作家如高峰中峰兩和尚  
父子智燈相續各有語錄並增入藏其他或有

無名詩金卷上  
無趣和尚忌辰陳供養畢拈香云此一瓣香焚  
向爐中爲光明雲爲祥爲瑞專伸供養敬畏庵  
中無趣空和尚惟願於光明中劈開面門現大  
人相與諸人等大家描摸遂作女人拜云看看  
山僧舌頭墮地了也咄

徑山語

示衆老漢本擬深藏鄉僻遣過生緣爭奈無趣  
老人有不了底公案在山僧出來與他了却僧  
問如何是無趣老人不了公案師便打僧云某

甲有甚過師云殃及兒孫

示衆大道無向背至理絕言詮迥出三乘高超  
十地萬法不到處特地光輝生佛未分時靈源  
獨耀不落見聞不隨聲色直下無一絲毫頭徧  
界全彰奇特事直饒棒頭取證喝下承當猶是  
曲爲今時更或光景俱忘契心平等畢竟亦非  
的旨所以道向上一路千聖不傳學者勞形如  
猿捉影到這裡絕行絕解絕照絕用絕理絕事  
若倚天長劍凜凜神威如鐵牛之機羅籠不住

集名詩金 卷上  
三  
今日明眼人前不敢囊藏被蓋八字打開去也  
拈拂子云諸上座還委悉麼耀古騰今卽這是  
大千沙界一間身

復舉雪峰拈拄杖示衆云我這個爲中下機人  
時有僧出問忽遇上上機人來時如何峰拈却  
拄杖雲門云我不似雪峰打破這葛藤乃拈拄  
杖云我這箇爲中下機人時有僧問忽遇上上  
機人來時如何門便打師云大凡扶宗立教須  
是頂門具眼肘臂有符看他二大老殺活縱橫

甚生竒特仔細檢點將來猶是節外生枝若據  
山僧見處乃豎起拂子云只將這個普爲諸人  
無論上中下若要擎展一任擎展若要承當一  
任本當處處把斷要津箇箇壁立萬仞且道忽  
遇其中人來時如何萬國醉心嘗大鼎相逢攜  
手上高臺

清明示衆禁烟時節陳寒食荒塚野田人啼泣  
灰骷髏上活眼開鬼神茶飯都打失首陽山堪  
隱逸時人莫謂春無力一夜東風鼓少林落花

滿地成狼籍

復舉臨濟大師拈拄杖示衆云我這裡是活底一切臨時要用便用天如以拂子搖曳示衆云我這裡也是活底一切臨時亦是要用便用遂擲下拂子云臨濟止欠這一着在師拈拄杖云我這裡臨時要用便用不論死活雖然以拄杖畫圓相云臨濟天如總出這個不得

示衆孤峯頂上闊步大千十字街頭知音少遇不禮維摩詰不尊傳大士良久云舉頭天外看

誰是箇中人

示衆三界唯心萬法唯識卓拄杖云昨宵時雨滴空階一片綠苔俱打濕

示衆天清地寧時亨道泰摩盪正眼洞明肘後靈符光彩譬如善舞太阿終不自傷其手壯士展臂不借他力既是水到渠成自然風行草偃豈不見古德道緣不虛應似鏡臨形若能於心無事無事於心則法幢隨處建立時節因緣到來爲人一句作麼生道烹煨佛祖

示衆大道體寬長空絕跡按下雲頭別通消息  
同處同生風行草偃且今日把住爲人則是放  
行爲人則是軋坤一合地糊餅日月兩輪天氣  
毬  
雷執事示衆孤掌拍不響獨樹難成林大家出  
隻手掇起破沙盆大衆且道喚甚麼作盆良久  
云獨來將謂無相識鬧市忽然逢故人

四月八日示衆毘藍園裡曾呈醜古佛堂前又  
露形不是月光三昧力何年洗得你身清大衆

且道釋迦老子今日誕生未審此時落地也未  
一僧出云落地了也師曰你見甚麼人說僧無

語師曰杓卜聽虛聲

示衆古德有休去歇去底特地一場愁有一念  
萬年去底死骷髏上無活蛆還有關市裡虎麼  
一僧遶出師便出去其僧隨後云和尚道甚麼  
師曰老鴉入布袋去

過香積厨示衆古德云不敬功德天唯嫌黑暗  
女若恁麼何處出頭來又云有智王人二俱不



受雖然祇救得一半只今莫有不受者麼也好  
與二十痛棒何故不見道放下筌籬雖得價動  
他杓柄也無端

朔日拈香畢衆集師良久云思而知慮而解鬼  
窟裡作活計古人道胡蜂不戀舊時窠猛將不  
在家中外若是箇漢聊聞舉着剔起便行在當  
時這般人用得着在今日用不着何故大悲閣  
外數竿竹橫者自橫直者直  
端午示衆今日是端陽日輪正停午看取村落

人把筆書門戶婆子林雄黃孩童懸艾虎攀蒲  
映手青揮榴燒髮火祇知應賞時誰想三途苦  
時毒如是穢死魔何處躲禪流若也未知歸豎  
起拂子云急須薦取這一箇

示衆石屋珙大師道過去事已過去了未來不  
必預思量只今便道只今句梅子熟時梔子香  
大衆且道只今便道只今句爲甚麼梅子熟時  
梔子香還會麼豈不見丹霞和尚又道過去諸  
佛已過去了你等不必追念未來諸佛又且未

至你等莫妄想現在佛正當今日你是何人一  
僧出衆曰某甲今日不疑去也師喝曰汝見箇  
甚麼僧云某甲見處如紅爐上一點雪師曰未  
夢見在僧便喝師拈杖云喫得棒也未僧擬對  
師便打出  
松陵歸示衆水牯偷閒一月多祖翁田地必栽  
禾歸來懶得牽犁耙未審其中意若何諸上座  
過去已過去未來已未至正當今日還曾見有  
過去未來纖毫之相麼若理會得下分疎得去

任你早朝喫粥黃昏打眠有甚不甘其或未然  
更勞山僧從頭說起昔日南泉和尚道王老師  
不會佛法禪道自小牧一頭水牯牛擬向溪東  
牧未免食他國王水草擬向溪西牧亦未免食  
他國王水草不如隨分納些些總不見得諸上  
座隨分兩字大有誦訛在莫錯會好更聽一偈  
前山後從渠牧隨處悠悠本自安若也犯人  
苗稼去牧童還用更加鞭  
示衆良久云世界如許開闢爲甚麼在老僧手

鍊金詩錄 卷四  
裡便歸方丈

示衆若論此事十字街頭靜悄悄地窮岩絕谷  
鶴唳鶯啼正當恁麼時十箇有五雙匙挑不上  
還有本分道流出來證據看良久云直得天雨  
四花地搖六動不如歸堂喫茶  
示衆不登泰山不知天之高不涉滄海不知水  
之深此案區中至論也若是其中人則不然卓  
拄杖云手把虛空盛不得威音那畔卽今朝  
示衆急急用工夫单提狗子無脊梁堅堅起恰

似須彌盧打失昏沉窟掀開散亂魔廊然雲霧  
盡長夜月輪孤這箇猶是漸入佳境若論宗門  
中事開口便墮畢竟如何卽是卓拄杖云彌勒  
未開袋迦文已入山

示衆腰包裹糝入山頭脚未登高白汗流不是  
閒遊觀勝境皆緣未斷死生愁諸上座佛法徧  
一切處一切處竟不得祇有一處不覓自得且  
道那一處準良久卓拄杖云東廡頭佛殿裡  
示衆達摩不來東土人人壁立萬仞二祖不往

西軋箇箇常光現前自從面壁九年致使神光  
露布咄家醜不可外揚

示衆心本是佛造作卽乖道不屬修染污不得  
只此不染污諸佛之所護念山僧與麼說早是  
不着便不見道毫釐繫念三途業因瞥爾情生  
萬劫羈鎖卓拄杖云紅爐點雪黑夜穿針

示衆舉起拂子云未明這些子俱是妄卜度旣  
明這些子亦是妄卜度一僧出問未明時卜度  
某甲不疑旣明後爲甚麼也是卜度師曰豈不

見道不得春風花不開及至花開又吹落

示衆諸方有解猛虎項上鈴控驪龍領下珠握  
須彌山踔跳過大海劍刃上藏身冰凌上走馬  
大悲閣今日則不然身寒縫破衲腹餒煮藜羹  
徒則經行去慵來卧石牀

示衆明明百草頭明明祖師意笑殺老龐公至  
今猶瞌睡曾祖見人便面壁不解寒溫秘魔走  
到便擎义全無禮義南山鷲鼻不若死鱸西院  
鑷刀渾如鈍鋸且道大悲閣如何爲人卓拄杖

云輪王總未拋三寸徧界先聞刀斧聲

中秋示衆舉寒山道吾心似秋月碧潭清皎潔  
無物堪比倫遂喝一喝曰寒山大似抱賊叫屈  
吾心似秋月又道無物堪比倫石屋和尚道吾  
心勝秋月秋月非不明有圓復有缺安得如我  
心圓明常皎潔這老漢賣弄有家私怎柰勾賊  
破家永嘉道江月照松風吹永夜清宵何所爲  
却較些子雖然也是臘月扇子且道大悲閣今  
夜又作麼生賞翫以拂子打圓相云金風吹桂

子滿院盡清香

中秋夜師月下坐衆見亦來隨侍師指月示之  
衆擬問師便歸方丈

示衆古者道盡大地都是自己走殺天下人盡  
大地不是自己疑殺天下人直饒抹過二邊滴  
水滴凍到這箇門頭了無干涉諸上座還會麼  
豈不見德山焚鉢良遂敲門猶是奴兒婢子且  
道如何是主人喝一喝

示衆舉安國挺禪師在五祖時因僧問真性緣

起其義云何祖默然挺侍次乃謂大德正興一  
念時是真性緣起其僧言下大悟後寶應老人  
拈云五祖不合默然好與二十棒挺長老不合  
道正興一念是真性緣起也與二十棒其僧不  
合大悟也與二十棒寶應老還有過也無也與  
二十棒師曰寶應有過且置這許多二十棒教  
阿誰下手卽今有下手者麼出來與老僧相見  
不然大悲閣自下手去也便擲下拄杖  
示衆舉僧問仰山法身還解說法否山曰我說

不得別有一人說得僧曰此人在甚麼處仰山  
推出枕头示之瀉山云寂子用劍刃上事忽有  
人問冲長老法身還解說法否老僧對他道枕  
子擲

示衆不叅古釋迦不揖新彌勒正當恁麼時軋  
坤黑漆漆且道山僧在那裡躲根喝一喝云莫  
錯下註脚

示禪人

老僧昔年遊歷叢林叅尋耆德無非求箇歇處

無名詩金 卷上  
諸方老衲別無異說祇教人歇却在心休從外  
覓諸上座莫說從外覓你便從自己覓總是外  
覓了也倘故夜光尚在漁人手徒使人從合浦  
來  
諸上座老僧有真實語言苦口相勸各各自相  
體究凡聖情量淨盡自然真常獨露但將從前  
虛妄攀緣念想塵垢一時放下心如虛空他時  
後日自識得根源去在啗伯牙遇子期不是言  
相識

叢林建立祇爲修行本色道流宜從實履不可  
掠虛過日不可任意縱情切須諦審先宗畢竟  
是何標格但外絕諸緣內心不動六門虛靜萬  
慮冰清泯絕根塵無傷苗稼雖然更須知有向  
上一着在珍重

大凡出家人須會取佛意好若會得不在僧俗  
貧富貴賤但隨家豐儉諸上座盡是久歷叢林  
徧叅尊宿作麼生會佛意試出來大家商量看  
莫空腹高心好僧問如何是佛意師曰汝口似

真孔  
大丈夫須猛烈裂斷從前伎倆直下斬釘截鐵  
打破佛祖機關碾得須彌粉屑豈不見黃蘗爲  
人太親切臨濟三番喫痛棒向高安灘上省得  
來却把虎鬚顛倒捋又不見龍潭逼拶周金剛  
黑夜吹他紙燈滅如今子孫多不古耳內聞來  
口頭別如斯將謂作叅禪逗到驢年未休歇大  
悲閣下老婆禪也是重新增口業汝等諸人還  
知痛痒麼卓拄杖云一場狼藉

摩醯正眼六處洞明少室真機一超直入傳不  
傳之妙心悟無悟之面目直下斬釘截鐵還同  
滯殼迷封更若說性說心却是泥人洗澡會麼  
收拾不了

機緣

僧到人事了便問和尚如何是父母未生前本  
來面目師良久問云會麼僧云不會師曰描也  
描不就說也說不到

因一座主到師舉古德云窮諸玄辯若一毫置



無名詩金卷  
於大虛竭世樞機似一滴投於巨壑若恁麼不如歇去好上座還歇得也未主喝一喝師便打云客亭尚遠

二僧到師問曰却是作家禪客麼一僧曰和尚問甚麼師曰且過這裡來僧擬對師便打僧無語師曰龍頭蛇尾漢復指第二僧僧曰某甲道過了也師作拈棒勢僧擬出師喝曰同坑無異土

僧到問德山和尚上堂云及盡去也直得三世

如來口挂壁上猶有一人呵呵大笑若識得此人一生叅學事畢未審和尚識得此人否師放聲云蒼天蒼天僧罔措師便打出

僧問提婆宗時如何師曰一字不着劃僧云不問這箇師曰圓相不着圈

僧問此事人人本具箇箇圓成未審達摩來做甚麼師曰北斗七南斗八

師見僧來展手示之僧曰不會師曰與我一文

錢

僧問臨濟大師道赤肉團上有一無位真人如何是無位真人師曰胡張三黑李四進云及乎合煞來又道無位真人是甚麼乾屎橛師曰南人唱北曲

僧問臨濟大師有四料揀語意旨如何師曰汝逐一問來進云如何是奪人不奪境師展手作相招勢進云如何是奪境不奪人師作捏聚勢進云如何是人境兩俱奪師乃袖手進云如何是人境俱不奪師撒手便行

僧問如何西來密傳心印師呵呵大笑爾問措復問密傳箇甚麼師便打云開門漁笛近明月在滄洲

師亭前立次一僧問曰和尚在此作麼師指亭前水曰會麼僧云不會師曰門前一湖水無面亦無底年去復年來滔滔流不已

僧問清虛之理畢竟無身時如何師曰道者合如是進云向上更有事也無師曰雪隱鷺鷥柳

藏鸚鵡

僧問如何是輪王三寸鐵師曰嚇僧擬進語師曰任任徧界是刀槍僧有省又一僧問如何是佛法大意師曰死骷髏上撐活眼  
二僧論萬法歸一一歸何處一僧曰一心歸於萬法師叱之曰啗酒糟漢汝恁麼會要見老趙州驢年又驢年正未夢見在僧曰忽有人問和尚一歸何處時如何師曰爛溪直籠侗又一僧問曰機不離位墮在毒海如何免得此過師曰羈縻乾盡又問萬機不到處作麼生行履師驟

步入僧堂

僧問新年頭還有佛法也無師曰有問曰新年頭佛法聾師曰家家點火燒香處處篩籬播鼓進云謝師荅話師曰大悲亭今日不着便又僧問曰北禪烹露地白牛此間除夜作麼生師曰謝子供養僧禮拜師曰喫茶去  
歲暮一僧來問臘月三十日到來時如何師曰家無索債人

僧問祖師心印狀如鐵牛之機去卽印住住卽

印破不住不破又作麼生師曰匝僧禮拜師曰  
露

僧問臨濟大師有賓主句請師答一轉語師曰  
道來看進云如何是賓中賓師曰赤脚走紅塵  
進云如何是賓中主師曰長年無伴侶進云如  
何是主中賓師曰堂官叱吏進云如何是主中  
主師曰猛虎當路坐僧禮拜而出

僧到師問云何處來僧曰嘉定師曰六街三市  
從何處得定僧擬對師便喝又一僧入師曰適  
來這位大德祇對甚諦當僧擬進語師亦喝首  
座至理前話問之座曰二僧真嘉定人師曰你  
何處見得座便喝師拈棒座便出去

僧問婆生七箇子六箇不遇知音祇這一箇也  
不消得便拋向水中意旨如何師曰非公境界  
進曰忽遇其中人問時如何祇對師便打

僧問古者道從無住本建立一切法如何是無  
住本師曰豈不見道形生未質各起未名進云  
建立一切法聾師曰甚麼喚作一切法僧有省

師曰莫將支遁鶴錯認右軍鷺

僧到師問大德何處來僧曰廬山師曰古人道不向廬山尋落處象王鼻孔湯撩天如何是廬山落處僧曰舉卽不難傍觀者哂師曰不然你且舉看僧云和尚尊重萬福師曰我還疑着汝僧云不消師休去

僧問達磨未來時如何師曰家家觀世音進云來後如何師曰旋頭星出現又問如何是最上一乘師曰藤穿篾縛進云意旨如何師曰三十

年後

僧問興化和尚打克賓意旨如何師曰我今日不曾打汝引冤雪屈做甚麼嚮進云維那道人這保社興化道汝會了不入不會不入那曰總不恁麼有甚過被打師曰若使總恁麼打折拄杖亦未有啣棒分進云如何卽是師便打

僧到問古人道山僧若要通消息萬里無雲川上時此理如何師曰猶是堦下漢進云請師接上堦師曰放汝三十棒又一僧問如何是聖諦

第一義師抗聲云汝又要我說聖說凡那進云  
前人道去了也師曰阿誰進云達磨師進前把  
住云不審老臊胡其僧罔然師托開云偷乾薑  
爍棗漢出去  
僧問和尚百年後向甚麼處去師曰千株松下  
角灣灣百草頭邊亂踣跳  
師燒火次僧到問曰如何是自性天真佛師曰  
與我搬取一束柴僧搬柴了又問師曰這奴子  
好惡也不知便打

僧問一毫穿衆穴時如何師曰直須自在進云  
自在後如何師曰日出東方夜落西

拈古

真歇了和尚道處處覓不得有一處不覓自得  
良久云賊身已露

師云處處覓不得且道何處不是有一處  
不覓自得人無下賤下賤自生長久云甚  
麼處去也賊身已露還我賍來乃曰真歇  
和尚祇解閉門作活未知奪角衝關且道

如何是奪角衝關底句卓拄杖云扛沙入水

歸宗問僧云子裝束了何處去僧云諸方學五味禪去宗云我這裡一味禪爲甚麼不學僧云如何是一味禪宗便打僧云莫打某甲我會也宗云你作麼生會僧擬開口宗又打

師云這僧被宗老要關把定無處躲根然雖如是宗老亦被這僧穿却鼻孔何處出氣今日衆中或有代他出氣者麼衆無對

師自代云恩多成怨

頌古

經前題上以字不成八字不是是甚麼字  
文彩纒彰字已成不知此字喚何名閣經三藏  
無搜處忽聽雲堂板一聲

黃龍選住持

宗師口直心猶直鼻孔捺天不覆藏床脚鐘樓  
當路虎節文義理實難當

魯祖面壁

要人省力自勞力本自無端又起端總令生佛  
未來會也使鰻魚上竹竿

睦州如喪考妣

去歲重陽曾賞菊今年賞菊又重陽人心爭忝  
自明暗那事何曾有變常

女子出定

世尊會說法文殊用盡力罔明彈指間女子從  
定出一火而鑄成思量最難得

青州布衫

衫子青州出拈來重七斤一百十二兩莫錯定  
盤星

趙州喫茶去

曾到未到喫茶去空門侍者絕疎親要將滋味  
均同得一樣烹來普施人

百丈開田

躬行數步立展兩手佛法大義那箇不有尋常  
論作是開田毒氣何曾離得口

僧問授子法身還受苦也無子曰地獄豈



是天堂

天堂地獄由心造了得無心罪福空只有法身  
空不得本來無影亦無踪

趙州問投子大死人活來時如何子云不  
許夜行投明湏到

死去活來有甚異不行要地也無難趙州差張  
二李四投子撥李四張三

夾山叅船子和尚

藥山掩口華亭覆舟青天霹靂白日血流盡已

盡人無盡盡青山綠水白悠悠

雲門日裏看山

日裏看山明白話層層疊疊萬千重天聰畢索  
耳根出祖意西來在此中

六祖答不會佛法

碓頭三下三更鼓夜半分燈過嶺南親言不得  
又不曾灼見黃梅不妄傳

僧問洞山清淨行人不入涅槃破戒比丘  
不入地獄何如山曰度盡無餘影還他越

涅槃

清淨破戒元無二涅槃地獄有何形不知度盡  
無遺影一陣香風起少林

德山托鉢

平地洪濤起德山雪峰隨浪挈波瀾岩頭突出  
翻潮手倒嶽傾湫闊一番

仰山一二三子偈

一二二三子大鵬纔展翅平目覆仰視虛空誰  
把住兩口無一舌塵塵刹刹說此是吾宗旨言

中無別事

雪竇與李殿院并羽士秀才同坐李問三  
教中誰尊竇下禪床叉手而立李云何不  
道竇云對夫子而難言

試問教中誰是貴側身叉手獨稱尊這軀寶相  
人人具何獨三家村裏尋

馬祖離四句絕百非

勞倦頭痛却不曾一盤托出不辜人復云頭白  
與頭黑可是饒金與益金

達摩大師頌

胡鬚儻侗又顛預無聖無凡本廓然一片赤心  
云不識自知無計渡江南

雪峰一日叅德山山云你與我喫義存來  
冷灰荳爆呼侍者欲通消息到潘郎老婆一片  
心徒切不是知音不洞房

高峰上堂云盡十方世界是箇鉢孟汝等  
諸人行住坐卧俱在裡許若也識得達摩  
大師與你爲奴若也未識二時粥飯將甚

麼喫

佛祖家風衲僧活計百姓日用無不在內喫粥  
喫飯也要仔細

巖頭三句

三句皆從內一句不知一句又何來吹毛利處  
言思斷徧界巖頭笑滿腮

香巖獨脚頌

香巖老人露刃劍觸着應知命莫逃總使鋒前  
超得過也應脫殼換皮毛

金言金卷一  
一庵王豎拳

但知春色無高下誰信花開各不同殺活縱擒  
非趙老誰能識得老婆雄

臺山婆子

驀直一條平坦坦與他勘破太區區崎嶇平坦  
都行遍穩坐臺山樂故居

檀頭有省

踏破草鞋無覓處得來全不費夫工尋常一樣  
窻前月纔有梅花便不同

次德山托鉢頌

梅蘊芳姿將欲粉春隨根藹動香魂東風吹出  
林間去惹得遊蜂滾到今

讚

觀音

云從聞思修頓入三摩地無爲未必真有作何  
所取良哉濟世者出此方便語勿以耳聞聲眼  
觀猶不許某人寫爾形目之皆可喜若謂這箇  
是遠之又遠矣除此別相兄驢年何所似突出

劫前眸鑑此慈悲體

水月觀音

大智若水大滿若月自在體同三無差別是境界中誰生誰滅我作是解認龜作鱉

魚籃觀音

筐攜小鱗索撩天價遇知味人可賣不賣負之而趨償馬郎債翳形而去從人笑恠

指顧觀音

從聞思修至成寶覺曲盡時機也知絡索不耳

聞聲眼聞亦惡一指頭禪何處描摸

題二祖圖

達摩何曾面壁神光何曾立雪圖者如虫嚼木偶爾成文觀者指鹿爲駒認龜作鱉咄

達摩

梁王殿上曾虧本石壁巘前又弄竒不是神光輕覩破至今猶是雪花飛

佛祖手卷

一隊老古錐不知爲甚麼水石山樹邊行住復

無名詩錄 卷上  
坐卧世外并世間盡情俱說破大地及虛空都  
來無別箇當央展向與人看黑白未分皆話墮  
咄

傅袈裟

塔前付囑無多子百萬人天那裡尋未審是誰  
成漏泄至今殃禍及兒孫

古卓真

若謂這箇是古卓紙墨雲烟空索索若謂這箇  
非古卓丹青點出顏無錯慈隆悲濟難掩藏威

容德相宜圖却老禪翁何灑落光風霽月心寥  
廓捻藤杖驗龍蛇腕諸方鶻鼻布衫搖麈尾闌  
玄言開一隊生盲後學兒孫不必湯搏量酬恩  
祇在香一握

義道中真

無希曰道不倚曰中二義一覺了無所容興衰  
補敝兮頭頭合轍革故鼎新兮事事皆同顯大  
悲之如幻三昧開庭栢之據實心宗湛然一寂  
歸真際萬象森羅列下風

玉峯圖

素壁爲峯玉作山大都俱在白伽藍雲蒸霧擁  
元無淨萬別千差總不班銀世界中開寶相水  
晶宮裡現優曇象王放去無尋處問取前三與  
後三

三教圖

三家村裏元無事行者須從坦道歸到此脚根  
而未穩依然打入是非堆

師子端禪師

林端師子王雲間曾返擲人謂逞風流我知示  
真寶毛彩付阿誰至今絕消息

無幻禪師語錄卷上

終

無幻禪師語錄卷下

三十一

寶藏堂

真寶手錄付阿難至今發悟息  
林微雨半空雲間曾及嶼人晴景風雲外映示

無幻禪師語錄卷下

門人

編集

偈頌

集無趣和尚語偈偶成三首

法偈不多句言言是指南掀開須自看不被筆  
頭瞞畫畫無長短行行非正偏恁麼猶未薦何  
處問西傳

逐物非良輩循言豈丈夫無思同木石有念悉  
狐魔擬議三千里承當八萬途如何爲諦當猫

無幻語錄

卷下

一

三九

寶藏堂



子問狸奴

元自平常理施勞  
早自欺卽今非是  
悟往日不曾迷  
所作皆如幻安然  
本若愚同叅相訊  
問直下一聲噓

叅禪偈十一首

叅禪須猛烈一切莫交涉  
擬涉一絲毫萬生叅不徹  
禪是眼中珠如何着得肩  
何用別尋頭杓  
鏈元是鐵

叅禪不等閒推倒人  
我山敲出虛空髓  
揮開佛

祖關追廻千古夢  
放下是非擔獨步  
千峰外十方彈指間

叅禪湏切已不可從外覓  
打水求杖痕捫空尋鳥跡  
要徹祖師機頓超心意識  
毘耶雅默然少林祗面壁

叅禪不徒叅念念入虛玄  
對境心無住當機體自圓  
真如何得失本覺絕中邊  
皓月無私照千江空湛然

入道方便門叅禪最第一  
靜極已忘形忘形心

無名詩金 卷下  
湛寂湛寂合太虛太虛無一物無物卽本來千  
聖從茲出

泰禪湏出類玄機無伴侶瞬目越三乘揚眉超  
十地喝散蝦蟆羣奔逃窠臼隊傾盡野狐涎直  
取少林髓

泰禪無後前三際一時圓踏着今時地融通劫  
外天一毛吞萬像大海出微涓泰到無泰處圓  
頭圓更圓

泰禪祇恁麼恁麼已成多一塵纔着鏡萬像悉

糊糝風靜千江寂雲空片月孤語言前一着仔  
細用工夫

泰禪非守中隨處悟心宗蛙鬧池塘月蟬吟樹  
裏風水流魚躍浪花謝蝶翻空覲體無餘物何  
湏執坐功

泰禪絕三思直捷了言辭實理非修證真心無  
受持泥牛哮吼去石女點頭時空劫前來事行  
人知未知

泰禪活潑泰不可死測度大藏半字無毘耶一

絡索圓相弄泥團捲簾成大錯憶昔老瑞庵面  
皮不知落

示禪人六首

吾宗如湛海微動卽平沉纔起修行念牽歸知  
見林枝窮方得本鑛盡始知金不立超玄志終  
須落古今

心閒無靜鬧何必入林丘狀動非真行忘緣是  
正修解空寧住寂涉境不隨流旣達空王旨寃  
家也聚頭

菩提非取捨何用歷多辛識妄元非妄尋真已  
失真日晡剛道夜臘盡便知春時節因緣到何  
曾昧本人

曠劫循文字都緣錯用心爲渠迷漏習特地訪  
知音理性無高下機權有淺深言前如未薦七  
處轉難尋

古德思修日平時亦送迎祇緣常自覺所以不  
隨情道體恒空寂人心屢變更一從聞見盡觸  
處自分明

蘇詩集 卷下  
直捷車溪路逶迤更不迷若將心向背又見迹  
東西須信力非力無憊齊不齊脚頭如未穩動  
步便沾泥

山樓寄幻

疎慵難順世徒跡憇雲邊實際元無地浮居聊  
借天樓心空界上縱目遠山巔聞見絕朝市凭  
虛了幻緣

登烏瞻山

曲徑通玄路樓臺迥碧空霞氣籠石壁秋色下

梧桐鶴唳堦前月猿啼澗底風長歌人不見深  
院白雲封

辭招遊石湖

我懶不出戶人來招勝遊因思摩竭令何事石  
湖舟月吐半簷白梧飄滿地秋閒情誰委悉應  
是我同流

徑山回至圓明禪院關居二首

歲暮下空碧來樓湖上關八風門外撼一竅箇  
中圓白日誰爲伴黃昏我獨眠通宵今古意都

無名詩金 卷下  
五  
寶珠堂  
在寂寥間

莫謂居闌逸終朝不自閒  
燈挑無燄火香蕪息  
心丹禪坐未生體  
經看無字函盡形  
如此去誰論釋和玄

雪溪道中

我欲尋湖勝乘閒渡雪溪  
水平天上下山陰路  
高低鄰近烟連陌  
莎長綠遍堤呼童問行徑  
指我石橋西

訓西歸子

塵刹如來境因何獨樂西  
蘊空真樂土心淨古  
阿彌忍辱頻伽烏柔和  
寶樹枝脫然憎愛盡  
蓮蘊七珍池

嘆皮袋子

檢點這皮囊有甚堅牢計  
足無半點根喉有二  
分氣呼吸如不來榮枯  
一時棄舉世盡難逃  
幾人知是戲

訪靜源禪友於金山

白適居之逸無能更遠遊  
因思舊相識特入古

林丘山霽時還合泉聲夜不収靜來源既徹方可渡中流

入信七首

任世休忘出世因進修須是契天真多生昧却靈明主歷劫甘爲懵懂人萬聖不談心外法千經皆演性中文男兒具有衝天志肯住權乘漸海濱

禪宗一着非容易務要當機究的真或不現生而徹証定應來世逐風塵將叅佛祖未來事貴

在從空放下心我亦罔諳先聖旨曷曾自肯諷  
因循

大聖真規日可觀不遵古典籍何般狂心未息  
今須息世事應寬就放寬眼底紛紛奔渴鹿天  
邊急急走飛丸吾曹有志同叅者尚爾臨機亦  
被瞞

真修畢竟宗圓頓小果權乘未足竒藥不瞑眩  
痾莫瘥心非穎悟習難祛儒云盡性方臻極道  
曰修心可作基祖佛代傳非外術不應諱疾忌

良醫

修行先要識心王弗識徒勞萬劫忙若以一知  
爲了當不循法執便成狂從前佛祖皆良範續  
後兒孫可度量寄語同參須仔細莫教錯認女  
爲郎

叅禪端爲出囂塵豈類尋常事等倫呼吸順情  
迷本領刹那忘照失元神竿頭進步重加益撒  
手懸崖亦未真此度出頭須諦當那堪烏暗謾  
因循

大道明明似掌平何須委曲復勞形三千律法  
収心術十二雄文却妄箴但莫縱情思善惡亦  
非忘念昧靈明去來今相渾無剩覲體全彰不  
用尋

山居十首

徒則經行懶則眠世間何物不相便年年爲客  
路常險日日看山心自閒事理極知須俊傑安  
危未識總顛頂當機不解離言說空向雲林學  
指南

貧無一物是吾家日用般般豈足誇五六百竿  
隣舍竹兩三四樹過墻花雲山萬疊支晨供瀑  
布千尋瀉午茶好景自然天設就不須辛苦強  
安排  
聞說烟霞有樂情僕夫心渴入柴扃但知棄世  
便安穩豈識當機要眼明蔬食也諳庭歲月敞  
廬還解暢平生一朝未剖韶陽句深負岩居與  
谷耕

須先盡曠却無明趁早修若把技能爲實學終  
成管見作時流如同入國朝明主擬到潼關卽  
便休

英靈袖子異尋常坐窳行叅在撥忙覷破身心  
如電露巖持戒律若冰霜濃齋疊案慵趨席好  
友呼渠不下床颺却萬般家裡看但除自己別  
爲狂

搜窮三藏元非字爲甚因循不窳心有漏界中  
橫着脚無爲堂裡少知音升沉六道安閒少繫



無名詩金 卷下  
屬三途利害深告報諸方玄學者蒸砂無飯不  
須尋

行非實德道非深煞有人來問祖燈一衲蒙頭  
貧似洗通身徹骨冷如冰自無半句閒枝葉懶  
打諸家舊葛藤傳與諸方龍象輩多年學得百  
無能

老去風霜入骨寒此身當與虎相看心因直捷  
難迂曲性本靈明不着瞞趨座懶陪皆故紙出  
門遙望盡驚湍年來得箇安閒法忘却諸方五

味禪

吾生百拙交疎遠門徑雖通絕送迎經蠹昨開  
函有跡病甦今與藥無情生養可托充饑餒舊  
習應宜速改更分定不須重計較勞形役慮又  
生心

世遠雲深視聽竒了明方始絕狐疑常聞澗底  
泥牛吼每見山頭躍鯉魚鴉噪鹿鳴皆活句蘿  
墻蔓壁盡新題無情有性咸平等說法何曾有  
間離

雪中卽事二首

放去拈來有甚麼分明大地絕纖瑕青山點出  
天然境茅屋粧來物外家竹几無燈還待月瓦  
餅有水不簪花箇中會得真消息眼裡平空又  
着沙

詠雪看梅不意中溪山常與我相同明時意得  
依前暗寒處情忘始見空經濕推窗凭几曬衣  
寒後座就爐烘觀君體覓西來事動止隨宜自  
合宗

述懷

潦倒疎慵貧病漢水邊林下了浮生乃微難作  
有爲事眼鈍慣看無字經不着相禪隨處坐離  
文字句及時賡箇中非是從人辯但有虛空是  
證明

荅冲玄計居士

決意逃禪志不羣此心端的遠塵氛莫隨有相  
光中轉但向無言句外聞夜後啟窗陪皓月朝  
來移榻掃殘雲非非是是從他去日對烟爐栢

子熏

詠時弊三首

古德思修便退藏今時渾不辯  
迤臧調心未得歸真朴  
應世還同在色莊  
僅向口頭談般若  
曷曾衣底鍊金剛  
相逢盡道叅禪好  
那箇蒲團肯坐忘

像季寥寥無正信  
圓機直示尠承當  
多將權化門爲實  
却把祖師心盡忘  
訛解活機開法眼  
惟遵死句守枯椿  
不由古道尋方便  
捨父迷頭徒

自和

平時總說心爲主  
一事相關至便忘  
大抵物從心卽正  
多應心逐物成狂  
空居未盡窮空理  
識處難逃漏識忙  
我輩又甘爲事末  
不知誰做出頭郎

省身三首

四緣假合浮漚體  
六識調和幻化身  
畢竟有渠成我愛  
定非無相別生嗔  
因貪五欲投交報  
爲染情塵結死生  
老去不諳知止計  
驢年方得出

沉淪

此身危脆同漚泡攝養殊方總不堅錦褁玉食  
猶未淨調精運氣亦難全通身莫禦蟲疢疾九  
孔常流濁穢泉如是這軀何所實更於痴想墜  
長年

波波挈挈甚來由信類野駢不久畱三寸氣存  
機未息四因緣謝業難酬無根壽命同萍跡有  
限光陰若電流身世大都俱放下三根椽下且  
埋頭

物外偶成六首

真寂自能含萬化染心應不契斯宗了然得旨  
虛空外廓爾無心罔象中簷溜滴聲何是水竿  
幡流影定非風未諳卽境惟心者到底將西喚  
作東

法非頓漸與偏圓祖意西來亦是權了却目前  
無一物始知教外有单傳洞山五位悟非悟臨  
濟三玄然未然剝盡許多閒骨董威音誰定劫  
初前

無名詩集 卷下  
此事明明不屬他無端倪目起狂華炷香脫去  
心猶妄點墨封圓見已差徹骨快湏挨白刃故  
鄉元不在三車未能逆斷闌空索拄杖千峯莫  
厭賒

身沉出沒非他物動靜施爲總在心迷去實花  
難結果悟來黃葉易成金迦文謾說三周喻慶  
喜徒勞七處尋碧眼丈夫宜自看莫教錯認定  
盤針

至理從來絕妄真工夫奚得論疎親弘宗必藉

超玄種樹法還湏過量人不識月輪徒望指未  
忘言路湯揚塵幾多逐色隨香者錯認青黃作  
曉春

道非跨虎與降龍貴在空空空不空鶴唳鶯啼  
須辯的蘆花月色溷雷同卽心是佛成兒戲指  
石爲金亦妄通除却白拈提掇外誰能鼓舞少  
林風

遊山七首

幾年塵底卧樊籠此日排雲上碧峰踵頂已知

無名詩金 卷一  
十四  
觀中  
天地小懸崖不覺我人空盤彎曲徑玄歧活疊  
香層臺法界重平地揭開天上眼萬方都在一

晴風暖日湯山行拄杖橫擔百獸驚透頂到峰  
雙鳥健磨灣轉角一身輕烟霞罅裡攀羅去風  
月巔頭不憇程直入萬千重上望青山猶在白  
雲層

拔地叅天骨有靈迥然突出太初形懸崖瀑布  
灑空白列石層巒過眼青最大極尊無我相通

玄微頂可人情咸含衆類多生化萬古乾坤得  
重名

疊疊重重不盡山人生能得幾躋攀回頭塵世  
迢迢遠屬月晴雲片片開萬仞崖巔無俗客孤  
峰頂上有禪關道人幻寄烟霞裡不放浮名落  
世間

跏趺盤結半山中的一念忘來萬境空不向此間  
尋落處更宜何地覓心宗樹頭幽鳥啼新句谷  
口閒花笑古風一軸畫圖誰展卷浮雲流水任

西東

欲訪知音上翠岑，登登直入亂霞深。經危涉險  
沿崖問渡澗，穿雲是處尋。但見奇峰高插漢，罕  
聞碩德嚮葳林。青山不動人非古，滿目秋風自  
慄吟。

拄杖挑雲上碧峰，芒鞋踏破古人踪。孤筇探盡  
千江水，萬境收歸一芥中。別路迢迢回步近，遠  
山疊疊轉頭空。烟霞風味咸知悉，湯興歸來月  
又東。

行踪二首

罔識凍流元是水，自甘跋涉走山川。芒鞋脫綻  
根塵破，布衲毳毼徹體寒。途路踐來成險曲，飯  
羹嘗徧總餽餒。誰知廢盡通身汗，依舊眉毛在  
眼邊。

天真之性詎曾殊，自去隨流失却渠。動靜施爲  
須達本，經行坐臥只如愚。心同木石閒諸想，量  
等虛空納萬餘。此理古今人共具，自來不特在

頑余

金言金  
卷一  
實夢堂  
托鉢

朝悠悠也暮悠悠瀟灑元同不繫舟一衲囊身  
知旅泊千門乞食示生由道非人與從誰覓過  
在貪求合自修隨處住於無所住溪光雲影暫  
相畱

生日偶成

晝不看經夜不禪順時調攝盡身緣資生僅有  
三餐辦俗慮渾無一念懸落落太虛雲數片冷  
冷空界月孤圓行歌坐笑從吾適忘却先天與

後天

村居

索居閒處未可獲邂逅江村且適吾除地竹高  
清氣爽隔牆梅發暗香多常陪夜月奚曾約來  
慣幽禽不用呼景物自成非力致此中無寄欲  
如何

荅同叅

相逢盡說世途難自向安中討不安學道且忘  
名利路修真應到爛髀乾生緣豈用過前料老



計惟憑退後看福利只宜隨力量勞形役念悉  
無端

峇梅村

一錫湖湘幾十秋叢林想已飽經遊臺山曾見  
文殊未鷲嶺還逢迦葉不衣止曹溪今詭守燈  
懸少室近誰箒憑公問箇真消息傳與叢林作  
話頭

登萬壽山懷古

短策來登萬壽山松廻石徑白雲環梵荷池上

香猶在空翠庭前鶴未還坡老詩名盈海外文  
翁禪語徧塵寰生緣一日重流轉掃盡藩籬滿  
世間

春晴溪望

禪餘挈杖拄芳立西望水容何太清野老肯攜  
今日座沙鷗未減舊時情雲橫曉樹開還合風  
送春帆去復輕我勿放閒評世幻獨看生相悉  
非生

過圓明禪院二首

金言詩金卷下  
三尺烏藤一衲斑暫來湖寺寄雲關四簷有水  
絕輪跡盡地無隣得自閒明月夜來非我約好  
風時至不吾攀禪流若解其中意何用持盂更  
入山

敝屋蕭蕭丈許慳住來幽隱絕人板兩函梵唄  
一張凡獨箇蒲團七尺單筒裡不懷榮辱夢此  
中罔有是非開花開花落隨他去也笑春風空  
往還

答見招

吾生百拙難酬世潦倒惟堪在息機往事不能  
重記憶鈍根還得自提撕饑瘡作患煨新芋病  
骨逢寒補敝衣日用但隨緣過日豈甘逾分落  
便宜

答幻上人日用工夫

禪兄詢問做工夫老我生涯苦不多日啜兩食  
無米飯夜叅一箇嘴盧都情山岌峩和根拔欲  
海翻瀾徹底枯末後一機難舉似石人撫掌笑

呵呵

頌清淨經內觀其心心無其心 二云云

遠觀內外皆無物罔識能觀是甚人有見固知  
非解脫循空應是昧天真纖塵不立猶迷跡當  
處常靈墮識神祇箇不依他去任自無今古自  
昇平

知幻究真

大地山河皆幻有從渠處覓匪家珍色空明暗  
如難會見覺聞知總未真池底金烏形在日月  
中童子影歸人指盲盡作圓融理猶滯功家五

位勳

念佛頌四首

發心念佛循公道念念無私佛自靈念到公私  
俱不現惟心惟佛更何論

正心念佛無多子一句明明不覆藏若在此中  
親薦得蓮花處處自生香

念佛休論閑與忙時時無間始相當一聲喚醒  
慈悲王刹刹塵塵是淨邦

真心念佛錦添花功德難量等海沙六處顯然

全集現同名同號更無差

指心八首

動口全拋一片心  
擬思量處不知音  
百千年外看家話  
倒腹傾腸說與君

起念求心心卽念  
頓然無念念無心  
九重之內常爲主  
徹古該今不動尊

忙忙尋覓主人翁  
因地逢渠枉費工  
不足一番顛倒力  
爭知夜半日輪紅

盡心竭力用工夫  
內外推求實總無  
正恁麼時

無計可忽聽村內一聲歌

作用施爲總是心急  
湏薦取莫沉吟  
但於事上通無事  
錯亂縱橫總是真

卽心卽佛隔皮言  
非佛非心亦是權  
端的要知真寶處  
直須吐盡野狐涎

欲覓如如不動心  
飛沙走石滿山林  
雷轟電捲翻滄海  
總是平常這箇人

覓心起處不可得  
忽地起來難料量  
不是道人無把捉  
十方諸佛也難詳

牧牛圖

尋牛

排雲撥霧細搜尋幽壑重巖轉更深忽聽子規  
聲斷處夕陽回首自沉吟

見跡

山邊水際已來多滿路蹄痕見也麼雨後峯前  
雲冷淡角端影影更無他

見牛

樹底黃鶯囀一聲巖前水牯踈然興當央鼻竅

無迴避短索慌忙貫未成

得牛

驀頭牽轉這頑皮野劣麤狂溷溷除春色上堦  
芳草綠白雲堆裏共安居

牧護

得渠到手莫丟閒收放繩頭經幾番掉尾碧天  
雲影落那容足跡到人間

騎歸

水山情足便歸家穩坐騰騰步落霞吹斷沒腔

無孔笛此圓誰復更爭牙

存人

歸來寂寂卧空山  
簑笠鞭繩一併閒  
溪北溪南消息斷  
坦然高枕白雲間

相忘

了然無事萬機空  
廊爾虛靈面面通  
綠樹溪邊青草足  
碧天雲影任西東

還源

見聞聲色不施功  
堪笑從前自瞎聾  
春到樹頭

鶯語滑家無四壁  
日輪紅

入廬

這漢堂堂出衆流  
羅龍打鳳未嘗休  
等閒拈起龜毛拂  
挂在虛空眼角頭

六根

眼

一雙清碧晝長舒  
俯仰周旋得自如  
觀盡江山諸物色  
自家眉睫不相知

耳

無功詩金 卷下  
一竅靈通兩朵根音聲都向箇中分幾多溺聽  
流活地智者知機入妙門

鼻

祇因空直通靈竅氣息毫釐不許瞞野鴨過時  
曾受觸桂花香處得親傳

舌

搖動莫教無諦當吉凶榮辱箇中來未能得斷  
言思路不若深藏甚妙哉

身

美同天地真難得危若漚花不久長欲證金剛  
無漏體急將骨肉報爺娘

意

方堪息慮停機處瞥地昏沉散亂來變想多端  
無可料妙觀察智絕刪裁

雲棲六景

圓耀峯

陽鳥飛轉耀西峯道是無私也未公爭似衲僧  
曾返照大千都在一觀中

寶刀隴

吹毛劍與活人刀盡爲勞生直下拋這箇揮天  
無面背至今元不動纖毫

壁觀峰

九年面爾成何事今日誰甘又向君應是赤鬚  
無伎倆借來引彼未惺人

青龍泉

靈涎瀉出真珠沫觸着渾身冷汗流未了衲僧  
沾一滴劫初禪病卽時休

聖義泉

泉爲甚麼名聖義聖從何起義何來是人識得  
根源去五葉蓮花次第開

金液泉

這些流出本無多盡大地人用不竭五湖四海  
悉平瀾尚餘潤彼青蓮葉

峇見卓

不持糞掃本無塵爭奈貧兒未到門不動步兮  
俱踏徧甚麼喚作昔時人



無生

一刹那間應萬端頭頭顯現不誰瞞禪兄若問  
其中意白日青天仔細看

鑄鐘

自向紅爐煨得成高低隨扣發洪音爲他裡許  
無些子一吼能惺萬劫昏

拄杖

壁立一條無甚巧施爲動轉活如龍衲僧相見  
通消息點着須教立下風

火炮

團圍無縫罅綿密不通風一點無明裂分身刹  
土中

拄杖

無葉又無梢心空節節高生來無委曲到底赤  
條條

層巒夕照

層巒開夕霽祇樹隱琳宮雲外通樵客尋梁渡  
此中

巖臺夜月

巖臺雲不到冰鑑透重湖試問寒山子今宵意  
若何

寒江釣雪

寒花舞太虛萬像換人呂垂絲未有心孤吟恨  
無續

龕銘

死則寄幻生則藏醜無去來底汝不能囿

雜咏

山中四威儀

山中行暢幽情忽聞樹底泉吹笙千峰踏破歸  
來晚玉露一杯誰共傾

山中住無俗慮但看落葉溪流去你無情也我  
無情翠微深處雲千樹

山中坐忘今古鶉衣百結當胸破不將黃葉戲  
兒啼肯信空花開幾度

山中卧全身露老大乾坤只一箇羅雲爲帳月  
爲鈎伸去縮來都是我

又

山中行飛霞觀履輕懸崖去撒手上凌嶒  
山中住蘿屋依巖樹露堂堂千聖無尋處  
山中坐幾度朝還暮沒來由閒看空華墮  
山中卧衲被從教破赤條條自有娘生袴

心量歌

這一物甚奇偉亘古亘今恒不毀祇爲離名離  
相來無見無聞人未委本無形本無跡無去無  
來明歷歷捏不成團撒不開隨呼隨應何曾失

本非黃本非赤非紫非紅非黑白萬般顏色不  
屬渠渠儂却會分諸色非是韻非是聲亦非梵  
語與唐音雖然不屬音聲相渠是音聲個主人  
非是垢非是淨垢淨從人所染病渠儂元不涉  
毫釐端在其中爲號令也能大也能小小大方  
圓無剩少小則鷺子也難窺大則魔醯無見表  
也能凡也能聖凡聖盡從渠顯應凡因逐妄繫  
幽囚聖則從渠常妙淨又能善又能惡善惡二  
途俱造作善福生天亦是渠惡業受罪非他縛

亦能顯亦能隱隱顯從來無定準顯時現出萬  
般形隱處埋藏無見影亦能空亦能有空有二  
途俱不守大用繁興渠作爲空宗一着他爲首  
人無渠形體爛獸無渠行不慣禽鳥無渠翅莫  
翔魚鱉無渠鱗甲散天無渠何以清地無渠何  
以寧王侯無渠國不治萬化無渠總失真盡軋  
坤同日月大千沙界從渠攝上至佛下至蟻佛  
與含靈無不具諸佛悟此證菩提萬彙迷茲輪  
惡趣衲僧家須奮志剔起眉毛當薦是不識渠

今智卽愚識得渠兮愚卽智休擬議祖佛從來  
無別意咄三大劫修祗爲渠

十二時歌

平旦寅修行初不墮尋文心存了義尚不許豈  
徒紙上費精神

日出郊真色道人沒竒巧絕學無爲未到家那  
堪門外打之撻

食時辰飲啄隨緣續命根飯飽洗鉢人盡會拋  
匙擲筋誰同倫

禺中已雨前香味無多子未來曾到均一甌不  
解喫的甘渴死

日南午威光徧界輝今古逃形怖影難出頭接  
嚮承虛何處躲

日昃未深撥地鑪煨紫芋甘香來到鼻尖頭試  
問禪流會不會

晡時申龜毛繩子束樵薪擔頭防脫牢牢繫佛  
手驢脚何相親

日沒西窮子莫循門外走山南石虎解巡更急



須收拾子湖狗

黃昏成萬事千機都寢息纖毫不見露堂堂一  
物也無明歷歷

下是及一根拄杖暮頭揮盡

似將來不識這株

与才與子林萬水共常

風輕撼動道人重之宜自口地

不離自己脚根邊日用森森靡不露道

宜自悟莫弄閒條功不數抱根守節到春深定  
有歧頁

高尚人鳥フタケ  
壑千山追未及

號偈

月卷

我月

絶ハ

海と巴震山ノ道ノ尋ノ長ノ...

170 1 2 3 4 5 6 7 8 9 180 1 2 3 4 5 6 7 8 9 180 1 2 3 4 5 6 7 8 9

底

毫端

桂香与

長空浙浙來秋風奇雲薄霧潛其踪香分萬斛

長空玉宇無塵



170 1 2 3 4 5 6 7 8 9 180 1 2 3 4 5 6 7 8 9 180 1 2 3 4 5 6 7 8 9

大倉  
王  
字  
聯  
通  
新  
字  
號

此  
書

大倉  
王  
字  
聯  
通  
新  
字  
號

死也不

与聲阿耶阿耶師



七

廿九